

Transkription von Urkunde HBS 1371a

Ort, Datierung: Halberstadt, 1371-11-23

Signatur: Stadtarchiv Halberstadt, A 13

Inhalt: Rat der Stadt Halberstadt: Verpfändungsurkunde über die Vogtei zu Halberstadt

We Radesmestere Rad Burmestere Jnni(n)gmestere . vnde de Burghere ghemeyne to Halb(e)r(stad) bekennen openbare in diss(em) Jeghenwerdeghe breue dat vnse heren . de Erwerdeghe vader in godde vnde here Albrecht / Bischof to Halb(e)r(stad) . her Lodewich van Honsteyn de Eldere vnde dat Capitel dar selues vns hebben gesat vnde setten , de voghedye to Halb(e)r(stad) binnen der muren vor Twei dusent mark lodeghes siluers Bru(n)sw=/wicke¹ vnde Halb(e)r(stedescher) wichte de in des godeshus(es) to Halb(e)r(stad) nut vul vnde al gekomen sint . vnde settet vns de mit allem rechte alsodane wis also hir na bescreuen steyt . To dem ersten male dat alle de de oppe / der voghedye wonen de vor desser Settinghe schoteden vnde wakeden oppe der voghedye schullen mit vns endrechtliken schoten vnde waken vnde alle borgher recht gelik andern vnsen borghere(n) mit / vns dōn . de wile dat desse Settinghe steyt vnde we neschullen se op anders nicht dringhen . Sunder wat clōstere vnde de papheyt vnd(e) gheystlike lude vnde des Godeshus(es) man in der erghenanten / voghedye hebben dat sin vrye hōue Buleni(n)ghe . Eghen . eder vorlegghen huse . hōue . wōrde tins eder wat dat si des nesetten se vns nicht , dat schal en volghen vnde bliuen in alsodaneme rechte vn(de) vryheyt / also vore . Ok wat hōue sin . eder hus eder worde vnde gut dat dar to hort dar me vore nicht aue enschote de des en vorsetten se vns nicht sunder . dat schal bliuen also vore vnde bi namen Bartoldes / tegheders huse vnde hōue vnde sin gūt . vnde he seluen vnd(e) sine eruen . dat vnde dene . vnde de se gevryet hebben schal vnde schallen vrye bliuen likerwis also andere des Godeshus(es) man vnd(e) ere gūt / de ghenant sin Riddere vnd(e) knechte . Ok de papheyt . klostere gheistlike vnde begheuen lude . manschop vnde vryheyt de se hebben in der ergenante(n) voghedye der envorsetten se vns nicht sunder de / schullen bliuen in alsodanem rechte vnde vriheyt also vore . Ok wat vns(e) heren Biscop Albrechte vorbenomet . eder eft he nicht enwere sinen nakomelinghen boret to bulenede eder to houerechte / vnde denest dat eme boret van sinen klosterhouen klostern vnde gheistliken luden op der ergenanten vogedye des envorsettet he vns nicht dat schal ene volghen also vore . Ok wat vnse vorge(na)n(ten) here / Biscop Albrecht heft van tinse hōuenhusen vnde worde(n) vorlegghen eder vnvorlegghen des ensettet he vns nicht Sunder dat schal eme eder eft he nicht en were sinen nakomeli(n)ghen volghen also / vore Ok wat vnse heren de Domheren vnde dat capitel inder ergenanten voghedie hebbe(n) dat si eghen oder vorlegghen . tins eder gulde . vnde sunderliken vefteyn mark gheldes lodeg(en) suluers / jarliker gulde vriheyt eder Buleni(n)ghe eder wo dat genant si des envorsetten se vns nicht dat schal den vorbenomden vns(en) here(n) den Domhere(n) vnde Capitele volghen vnd(e) bliue(n) in alsodaneme / rechte vnde vriheyt also vore . Ok we wene vorvesten wolde vor dem dore vor vns(er) heren Meyere des enschulle(n) we vorbenomden Rad vnd(e) borghere to Halb(e)r(stad) nicht verbeden noch hinderen . / ghinghe ok we dare to deme dinghe van den de oppe der vo)ghedie wonen den de vestinge vnde de sake nicht an enghinge de mochte dat don ane vare dar enscholde en neme(n)t to dri(n)gen / de wile dat disse settinghe steyt . Vortmer schal desse settinghe stan Teyn jar an tobekenende van vtghift dissis breues dat se de vogedye van vns nicht losen enschullen dar na wanne vnse / vorge(na)nten here(n) eder ere nakomelinge eft se nicht enweren des endrechtliken to rade worden dat se de vorge(na)nten voghedye van vns losen welden dat scholden se vns dem Rade / to Halb(e)r(stad) vore weten laten to wynachten

vnde denne oppe den neghesten sente Joha(n)nes dach to Middensomer dar na . so scholden se vns vnse ghelt Twei dusent mark der vorbeno(m)=/den witte vnd(e) wichte beriden . Velle auer ene dar wat in dat se vns de Twei dusent mark oppe sente Johannes dach vorgeant nicht betaleden wanne se vns de losinghe oppe / de winachten vore gekundeget hedden so scholde desse settinghe stan van dem seluen Sente Johannes daghe an vort ouer twei Jar so mochten se in dem lesten der twier Jar vns / dem Rade to Halb(e)r(stad) echt de losinghe kundeghen oppe de winachten vnde dar na op den neysten sente Johannes dach to Middensomer vns vnse Twei dusent mark betalen . Were ok / dat se de betalinge oppe de tyt auer versumeden wanne se vns de losinghe also gekundeget hedden so scholde de settinghe echt twei jar dar na stan . vnde wo dicke dat de losinghe / vorkundeget worde vnde de betalinge dar na to sente Johannes daghe to Middensomer nicht enscheghe so scholde dat jo vort stan dem gelik so langhe went se vns deme / Rade to Halb(e)r(stad) dat ghelt to twei dusent mark betaleden vnde so scholde we vorbenomden Rad vnde borghere to Halb(e)r(stad) vnde welden de vorgeante(n) voghedie weder antwerden / vns(er) heren biscop Albrechte sinen nakomeli(n)gen eft he nicht enwere vnde dem Capitele vorgeant mit sodanem rechte vnde vriheyt alse se de vorgeante(n) vogedye vor disser / settinge gehat hebben . vnde so scholde we den van der voghedie los laten der huldegginge de se vns gedan hebben to vns(er) penni(n)ghen vorgeant Ok en schal disse vorgena(n)te vogedie / vns deme Rade vnde den Borgheren to Halb(e)r(stad) nicht verstan . Vortmer de breue de gegeue(n) sin vor diss(en) breue(n) twisschen vns(en) vorgeante(n) heren vnde vns schalme ghensliken / holden an beydent syden an al eren stucken . ane . also disse breue vtweisen de wile disse settinge waret vnde dar na wanne disse settinge vte is so schullen de breue wat dere vor / diss(en) breue(n) gegeue(n) sint bi aller macht bliue(n) in allen stucken . Alle disse vorscreuene(n) stücke loue we Radesmestere vnde Rat Burmestere Jnni(n)gemestere vnd(e) de Burghere ghe=/meyne oppe dem wibelde to Halb(e)r(stad) in gûden truwen vnsen heren biscop Albrechte eder icht he nicht enwere sinen nakomeli(n)gen vn(de) Hern Lodewighe van Honsteyn dem Eldere(n) / vnd(e) deme Capitele to Halb(e)r(stad) vorbenomet stede vnde vast to holdene ane jenegherleie argelist vnde hebben des to eynem orkunde disser dingh vnser Stad oppe(n)bar Jngesegeh an / diss(en) bref gehenget laten de ghegheuen is na goddes bort dretteynhundert jar Jn dem eynen vnd(e) Seue(n)teghest(en) jare In Sente Clement(is) daghe des hilghen heren .

¹ Brunsw=/wicke: Verdoppelung des w durch Zeilenumbruch